

RHEOLAU

Dyma reolau (“Rheolau”) y cynllun cwynion myfyrwyr (“y Cynllun”) a sefydlwyd gan Swyddfa Dyfarnwr Annibynnol Addysg Uwch (“y Cwmni”). Y Cwmni a ddynodir yn weithredwr y Cynllun yn unol â Deddf Addysg Uwch 2004 (“Deddf”). Mae’r Rheolau’n disodli holl reolau blaenorol yr OIA ac mae grym iddynt o 1 Mai 2008. Caiff cwynion a geir gan yr OIA cyn y dyddiad hwn eu trafod o dan y rheolau a fydd mewn grym ar y pryd.

Mae rhwymedigaeth statudol o dan y Ddeddf ar gyrf llwyodraethu pob Sefydliad Addysg Uwch (SAU) cymwys yng Nghymru a Lloegr i gydymffurfio â’r Rheolau. Dylai cyrff llwyodraethu sicrhau bod eu gweithdrefnau a’u rheoliadau yn gydnaws â’r Rheolau.

1. Diben

Prif ddiben y Cynllun yw adolygu cwynion nas datryswyd a wnaed gan fyfyrwyr ynghylch gweithredoedd a hepgoriadau SAU a gwneud argymhellion.

2. Cwynion a Gwmpesir

Mae’r Cynllun yn cwmpasu cwynion am weithred neu hepgoriad SAU a wnaed gan:

- 2.1 fyfyrwr yn y SAU hwnnw; neu
- 2.2 fyfyrwr mewn sefydliad arall sy’n dilyn cwrs astudiaeth, neu raglen ymchwil, sy’n arwain at ddyfarnu un o ddyfarniadau’r SAU.

3. Cwynion nas Cwmpesir

Nid yw’r Cynllun yn cwmpasu cwyn i’r graddau hyn:

- 3.1 os yw’n ymwneud â derbyn i SAU;
- 3.2 os yw’n ymwneud â mater o farn academiaidd;
- 3.3 os yw’r mater y cwynir yn ei gylch yn destun achos llys neu dribiwnlys a daeth yr achos hwnnw i ben, neu os yw’r mater yn destun achos llys neu dribiwnlys ac nad yw’r achos hwnnw wedi ei atal;
- 3.4 os yw’n ymwneud â mater cyflogaeth myfyriwr;
- 3.5 os nad yw’r mater y cwynir amdano, ym marn yr Adolygydd, yn cael effaith sylweddol ar yr achwynydd fel myfyriwr;
- 3.6 os yw’r mater y cwynir yn ei gylch yn cael (neu wedi cael) ei drafod o dan y rheolau hyn neu unrhyw reolau blaenorol o eiddo’r OIA, neu
- 3.7 os caiff ei gyflwyno gan gynrychiolwyr personol myfyriwr, ac na dderbyniodd yr OIA Ffurflen Gais y Cynllun yn ystod oes y myfyriwr.

4. Terfynau Amser a Dihysbyddu Gweithdrefnau Cwynion Mewnol

- 4.1 Rhaid i achwynydd yn gyntaf fod wedi dihybyddu gweithdrefnau cwynion mewnol y SAU y cwynir yn ei gylch cyn dod â chwyn ger bron yr OIA. Mewn amgylchiadau eithriadol, gall Adolygydd dderbyn cwyn i’w hadolygu hyd yn oed os nad yw gweithdrefnau mewnol y SAU wedi eu dihybyddu os yw ef neu hi yn credu ei bod yn briodol gwneud hynny.
- 4.2 Fel rheol ni fydd yr OIA yn ystyried cwyn onid yw wedi ei derbyn o fewn tri mis i’r dyddiad y cafodd y gweithdrefnau cwynion mewnol eu dihybyddu ac eithrio pan fo’r Adolygydd yn ymestyn yr amser oherwydd ei fod neu ei bod yn fodlon bod rheswm da dros wneud hynny.
- 4.3 Bydd y SAU, ar ôl i’r gweithdrefnau cwynion mewnol gael eu dihybyddu, yn anfon llythyr (“Llythyr Cwblhau Gweithdrefnau”) yn syth at y myfyriwr dan sylw yn cadarnhau bod y gweithdrefnau cwynion mewnol wedi eu dihybyddu fel hynny. Bydd y terfyn amser ym mharagraff 4.2 fel rheol yn dechrau o ddyddiad anfon y Llythyr Cwblhau Gweithdrefnau.
- 4.4 Anfonir Llythyrau Cwblhau Gweithdrefnau yn unol â chanllawiau a gyhoeddir gan yr OIA o bryd i’w gilydd.
- 4.5 Ni fydd yr OIA fel rheol yn ystyried cwyn pan fo’n credu bod y digwyddiad(au) gwreiddiol y cwynir amdano/amdanynt wedi digwydd dros dair blynedd cyn i’r OIA dderbyn Ffurflen Gais y Cynllun.

5. Derbyn Cwyn

- 5.1 Rhaid i gwyn gael ei chyflwyno’n ysgrifenedig, fel rheol trwy lenwi Ffurflen Gais y Cynllun.
- 5.2 Bydd yr Adolygydd yn anfon copi o’r gwyn at y SAU er gwybodaeth.
- 5.3 Bydd yr Adolygydd yn penderfynu a yw cwyn o fewn awdurdodaeth y Cynllun, fel y pennir gan y Rheolau hyn, a gall ar unrhyw adeg wrthod y gwyn os nad oes gan yr OIA yr awdurdod i’w hadolygu.

- 5.4 Gall yr Adolygydd wrthod cwyn ar unrhyw adeg heb ystyried y rhinweddau'n llawn os yw'r gŵyn, yn ei farn neu yn ei barn, yn wacsaw neu'n flinderus.

6. Gweithdrefnau Adolygu

- 6.1 Unwaith y bydd cwyn wedi ei derbyn bydd yr Adolygydd yn cynnal adolygiad o'r gŵyn i benderfynu a oes cyfiawnhad, cyfiawnhad rhannol, neu ddim cyfiawnhad i'r gŵyn.
- 6.2 Bydd yr adolygiad fel rheol yn cynnwys adolygu dogfennau a gwybodaeth arall ac ni fydd yr Adolygydd yn cynnal gwrandawriad llafar oni fydd yn credu yn yr holl amgylchiadau bod angen gwneud hynny.
- 6.3 Pennir natur a rhychwant yr adolygiad yn ôl disgrisiwn yr Adolygydd yn unig a gall yr adolygiad gynnwys neu beidio â chynnwys materion y byddai llys neu dribiwnlys yn eu hystyried.
- 6.4 Dyma fydd y broses adolygu arferol ar gyfer ymdrin â chŵyn:
- 6.4.1 Bydd yr Adolygydd yn penderfynu pa wybodaeth bellach (os o gwbl) y mae arno neu arni ei hangen ar gyfer ei adolygiad/hadolygiad; gall hyn gynnwys gofyniad bod y SAU yn darparu copi o'r wybodaeth a ystyriodd yng ngham terfynol ei weithdrefnau cwyno mewnol (ac unrhyw gofnodion cysylltiedig) ac ar unrhyw adeg gall yr Adolygydd ofyn i'r partïon ateb cwestiynau penodol a/neu roi gwybodaeth ychwanegol.
- 6.4.2 Cyn cyhoeddi Penderfyniad Ffurfiol bydd yr Adolygydd (oni fo'r Adolygydd o'r farn nad oes angen gwneud hynny) yn cyhoeddi penderfyniad drafft neu ragarweiniol (ac unrhyw Argymhellion drafft/rhagarweiniol).
- 6.4.3 Pan gyhoeddir penderfyniad drafft caiff y partïon gyfle i gyflwyno rhyw gymaint o sylwadau yn ymwneud ag unrhyw wallau ffeithiol o bwys a wnaed yn eu barn hwy ac a yw'r Argymhellion drafft yn ymarferol.
- 6.5 Rhaid i'r partïon gydymffurfio'n brydlon ag unrhyw gais rhesymol a chyfreithlon am wybodaeth y gall yr Adolygydd ei gyflwyno yn ymwneud â'r adolygiad.
- 6.6 Ni chaiff yr Adolygydd ei rwymo gan reolau tystiolaeth cyfreithiol na chan benderfyniadau blaenorol yr OIA.
- 6.7 Gall yr Adolygydd benderfynu cyhoeddi Penderfyniad Ffurfiol ar unrhyw adeg pan fo'n credu bod ganddo/ganddi ddigon o wybodaeth neu ei bod fel arall yn briodol gwneud hynny.
- 6.8 Er gwaethaf yr uchod gall yr Adolygydd ar unrhyw adeg geisio sicrhau setliad i'r gŵyn sy'n dderbyniol i'r naill ochr a'r llall (gan gynnwys, â chydysniad y partïon, trwy benodi cyfryngwr) pryd bynnag y bo'n ystyried hynny'n briodol.
- 6.9 Gall yr Adolygydd derfynu neu atal ystyried cwyn, fel y bo'n ystyried yn briodol, os yw'n ymddangos i'r Adolygydd,
- 6.9.1 bod y SAU wedi ymdrin â'r gŵyn yn foddhaol;
- 6.9.2 y byddai'n well ystyried y gŵyn mewn ffordd arall;
- 6.9.3 bod gweithdrefnau'n mynd rhagddynt o fewn y SAU neu mewn man arall a all fod yn berthnasol i'r gŵyn;
- 6.9.4 bod parti wedi oedi'n afresymol neu wedi ymddwyn yn afresymol mewn modd arall; neu
- 6.9.5 bod rhesymau da eraill dros wneud hynny.

7. Y Penderfyniad Ffurfiol ac unrhyw Argymhellion

- 7.1 Bydd yr Adolygydd yn anfon Penderfyniad Ffurfiol, ac unrhyw Argymhellion y bo'r Adolygydd yn penderfynu eu gwneud, at yr achwynydd a'r SAU cyn gynted ag y bo'n rhesymol ymarferol.
- 7.2 Bydd y Penderfyniad Ffurfiol ac unrhyw Argymhellion yn ysgrifenedig a byddant yn cynnwys rhesymau dros y Penderfyniad Ffurfiol a thros unrhyw Argymhellion.
- 7.3 Wrth benderfynu a oes cyfiawnhad dros gŵyn gall yr Adolygydd ystyried a gymhwysodd y SAU ei reoliadau ac a ddilynodd ei weithdrefnau yn briodol ai peidio, ac a oedd penderfyniad a wnaed gan y SAU yn rhesymol yn yr holl amgylchiadau ai peidio.
- 7.4 Gall yr Adolygydd, lle bo cyfiawnhad dros y gŵyn yn gyfan gwbl neu'n rhannol, wneud Argymhelliad/Argymhellion y dylai'r SAU wneud rhywbeth neu ymatal rhag gwneud rhywbeth. Gall yr Argymhelliad hwnnw/Argymhellion hynny gynnwys y canlynol, ond heb fod yn gyfyngedig iddynt:
- 7.4.1 y dylai'r gŵyn gael ei chyfeirio'n ôl at y SAU am benderfyniad newydd oherwydd nad yw ei weithdrefnau mewnol wedi eu dilyn yn briodol mewn ffordd berthnasol;
- 7.4.2 y gellid ystyried y gŵyn yn well mewn ffordd arall;
- 7.4.3 y dylid talu iawndal i'r achwynydd, gan gynnwys, yn ôl disgrisiwn yr Adolygydd, swm am anghyfleustra a gofid;
- 7.4.4 y dylai'r SAU gymryd llwybr gweithredu y mae'r Adolygydd yn ei ystyried yn deg yn yr amgylchiadau;
- 7.4.5 y dylai'r SAU newid y ffordd y mae'n trafod cwynion;
- 7.4.6 y dylai'r SAU newid ei weithdrefnau neu ei reoliadau mewnol.
- 7.5 Mae'r OIA yn disgwyl i'r SAU gydymffurfio'n llawn ac yn brydlon â'r Penderfyniad Ffurfiol ac ag unrhyw Argymhellion sy'n cyd-fynd ag ef.
- 7.6 Pan fo Argymhellion yn gofyn i'r SAU ddilyn llwybr gweithredu arbennig dylai wneud hynny o fewn yr amserlen a bennir neu, pan na phennir amserlen, cyn gynted ag y bo'n rhesymol ymarferol. Bydd y SAU, os gofynnir iddo wneud, yn adrodd wrth yr Adolygydd ar gydymffurfio o'r fath.
- 7.7 Rhoddir adroddiad am unrhyw ddiffyg cydymffurfio ag Argymhelliad gan SAU i'r Bwrdd ac fe'i cyhoeddir yn yr Adroddiad Blynyddol.

8. Y Dyfarnwr Annibynnol

Penodir y Dyfarnwr Annibynnol gan y Bwrdd ac i'r Bwrdd y mae'n atebol. Wrth benderfynu ar unrhyw gwynion dan y Rheolau hyn rhaid i'r Dyfarnwr Annibynnol weithredu'n annibynnol ar y Bwrdd, SAU ac achwynwyr. Yn unol â'r Ddeddf Cwmniâu, nid yw'r Dyfarnwr Annibynnol yn un o swyddogion y Cwmni.

9. Y Bwrdd

Sefydlir y Bwrdd yn unol ag Erthyglau Cymdeithasiad y Cwmni (a gellir eu newid o bryd i'w gilydd).

10. Swyddogaeth y Bwrdd

Bydd yr OIA a'i eiddo a'i faterion o dan reolaeth a chyfarwyddyd y Bwrdd. Bydd y Bwrdd yn cynnal ei fusnes yn unol ag unrhyw ddarpariaethau statudol perthnasol sydd mewn grym ar y pryd, ac unrhyw orchmynion neu reoliadau perthnasol a wneir o dan y darpariaethau hynny ac yn unol â Memorandwm ac Erthyglau Cymdeithasiad yr OIA, ac yn arbennig ond heb gyfyngu ar gyffredinolrwydd yr uchod bydd yn gyfrifol am:

- 10.1 Cydymffurfio ag amcanion yr OIA a nodir yng nghymal 3.1 o'i Memorandwm Cymdeithasiad a fydd yn cynnwys cynllunio, datblygu a chymhwyso'r Cynllun ond na fydd yn gyfyngedig i hynny.
- 10.2 Diogelu annibyniaeth y Cynllun a swyddogaeth y Dyfarnwr Annibynnol.
- 10.3 Penodi a diswyddo'r Dyfarnwr Annibynnol ar yr amod y gwneir pob penodiad neu ddiswyddo o'r fath mewn ffordd sy'n cydnabod annibyniaeth y Dyfarnwr Annibynnol.
- 10.4 Pennu pwerau a chylch gwaith y Dyfarnwr Annibynnol.
- 10.5 Goruchwylio perfformiad ac effeithiolrwydd y Dyfarnwr Annibynnol a'r Cynllun.
- 10.6 Sicrhau cyllid y Cynllun a rheoli risgiau a wynebir gan yr OIA.
- 10.7 Cymeradwyo amcangyfrifon blynyddol o incwm a gwariant.
- 10.8 Pennu lefel y tanysgrifiadau sy'n daladwy bob blwyddyn gan SAU a Sefydliadau nad ydynt yn gymwys sydd wedi ymuno â'r Cynllun â chaniatâd y Bwrdd.
- 10.9 Pennu tâl ac amodau gwasanaeth y Dyfarnwr Annibynnol.
- 10.10 Gosod fframwaith ar gyfer tâl ac amodau gwasanaeth staff yr OIA ar wahân i'r Dyfarnwr Annibynnol.
- 10.11 Pennu polisi mewn perthynas â safleoedd a ddefnyddir gan yr OIA.
- 10.12 Ystyried a ddylid ymdrin â diffyg cydymffurfio gan SAU ag unrhyw Argymhelliad neu argymhelliad neu gais arall gan y Dyfarnwr Annibynnol a gyfeiriwyd at y Bwrdd o dan baragraff 11.1 (yn ddarostyngedig i baragraff 7.7), ac os felly, sut y dylid gwneud hynny.
- 10.13 Adolygu a, lle bo hynny'n briodol, addasu'r Rheolau hyn o bryd i'w gilydd, yn amodol ar ddarpariaethau'r Ddeddf. Nid yw'r Bwrdd yn ymwneud ag adolygu cwynion unigol a phenderfynu yn eu cylch.

11. Pwerau a Dyletswyddau Pellach y Dyfarnwr Annibynnol

Bydd y pwerau a'r dyletswyddau pellach hyn yn eiddo i'r Dyfarnwr Annibynnol:

- 11.1 a) Rhaid i'r Dyfarnwr Annibynnol adrodd wrth y Bwrdd am unrhyw ddiffyg cydymffurfio gan SAU â Phenderfyniad Ffurfiol ac unrhyw Argymhellion a, (b) Gall adrodd wrth y Bwrdd am unrhyw ddiffyg cydymffurfio gan SAU ag unrhyw argymhellion neu geisiadau eraill a wneir gan Adolygydd.
- 11.2 Caiff y Dyfarnwr Annibynnol gynnal trafodaethau a chyfnewid memoranda cyd-ddealltwriaeth ag unrhyw gyrff neu unigolion y mae'r Dyfarnwr Annibynnol yn eu hystyried yn briodol ar faterion o ddiddordeb cyffredin, gan gynnwys cyfnewid gwybodaeth.
- 11.3 Rhaid i'r Dyfarnwr Annibynnol fynyachu cyfarfodydd o'r Bwrdd pan ofynnir iddo wneud hynny gan roi rhybudd rhesymol, a darparu unrhyw wybodaeth i'r Bwrdd y gall yn rhesymol ofyn amdani.
- 11.4 Rhaid i'r Dyfarnwr Annibynnol baratoi bob blwyddyn Gyllideb Flynyddol ddrafft a Chynllun Busnes drafft ar gyfer y flwyddyn ariannol nesaf i'w cyflwyno i'r Bwrdd a pharatoi adroddiadau ar berfformiad i'r Bwrdd.
- 11.5 Rhaid i'r Dyfarnwr Annibynnol baratoi bob blwyddyn ei Adroddiad Blynyddol neu ei Hadroddiad Blynyddol (a fydd yn wahanol i adroddiad blynyddol y Cwmni) ar gyflawni swyddogaethau'r Dyfarnwr Annibynnol yn ystod y cyfnod adrodd diweddaraf a ddaeth i ben.
Bydd yr adroddiad yn cynnwys gwybodaeth ynghylch:
 - (a) cwynion a gyfeiriwyd o dan y Cynllun;
 - (b) y Penderfyniadau a'r Argymhellion a wnaed gan yr Adolygwyr;
 - (c) i ba raddau y mae'r Argymhellion a wnaed gan yr Adolygwyr wedi eu dilyn (gan restru unrhyw SAU nad ydynt wedi cydymffurfio ag Argymhelliad);
 - (d) y ffordd y mae'r OIA wedi defnyddio'r ffioedd (os oedd rhai) a dalwyd mewn perthynas â'r Cynllun; ac
 - (e) enwau'r SAU hynny sy'n cymryd rhan yn y Cynllun.
- 11.6 Caiff y Dyfarnwr Annibynnol ymgymryd â gwariant at ddibenion swyddogaethau'r Cynllun, yn amodol ar y Gyllideb Flynyddol sy'n gyfredol ar y pryd ac i'r graddau y darperir ar gyfer hynny ynddi, neu ar gymeradwyaeth y Bwrdd.
- 11.7 Caiff y Dyfarnwr Annibynnol recriwtio, penodi, hyfforddi, rheoli a diswyddo staff.
- 11.8 Caiff y Dyfarnwr Annibynnol ddirprwyo, yn ddarostyngedig lle bo angen i gymeradwyaeth y Bwrdd, unrhyw rai o'i bwerau/phwerau i'r Dirprwy Ddyfarnwr ac aelodau eraill o staff y Cynllun ar yr amod ei fod/bod, wrth ddirprwyo unrhyw bwerau a dyletswyddau o'r fath, yn ymarfer pob gofal a medr rhesymol i sicrhau bod y cynrychiolydd yn defnyddio pob pŵer neu'n cyflawni pob dyletswydd o'r fath yn unol â'r safonau a ddisgwyliid gan y Dyfarnwr Annibynnol ei hun.

- 11.9 Bydd y Dyfarnwr Annibynnol yn pennu telerau ac amodau gwasanaeth/cyflogaeth staff y Cynllun (yn ddarostyngedig i gymeradwyaeth y Bwrdd yn achos telerau ac amodau'r Dyfarnwr Annibynnol).
- 11.10 Caiff y Dyfarnwr Annibynnol gyhoeddi penderfyniadau unigol a chrynodebau o gwynion ar ffurd ddiennw a gwybodaeth ystadegol.
- 11.11 Caiff y Dyfarnwr Annibynnol argymhell newidiadau systemig mewn polisi neu weithdrefn yn codi o gwynion a chyhoeddi argymhellion o'r fath.
- 11.12 Caiff y Dyfarnwr Annibynnol wneud argymhellion o bryd i'w gilydd i SAU er mwyn hyrwyddo'r Cynllun i fyfyrwyr.

12. Taliadau a Ffioedd

- 12.1 Ni fydd y Cynllun yn codi unrhyw beth ar achwynwyr am ystyried eu cwynion.
- 12.2 Mae gofyn i bob SAU dalu tanysgrifiad blynyddol llawn a/neu ffi achos, yn seiliedig ar raddfa gyhoeddedig, er mwyn cymryd rhan yn y Cynllun, a bydd y tanysgrifiad yn cael ei bennu gan y Bwrdd o bryd i'w gilydd. Ni fydd unrhyw ffioedd neu danysgrifiadau sy'n daladwy o dan y Cynllun gan sefydliadau sy'n gymwys yn ôl y Ddeddf yn fwy na'r swm yr ymgwyrodd y Cwmni ag ef, gan gymryd un flwyddyn gydag un arall, wrth ddarparu'r Cynllun mewn perthynas â'r SAU hynny.

13. Sefydliadau nad ydynt yn gymwys

O bryd i'w gilydd gall yr OIA gyhoeddi rheolau ychwanegol a fydd yn gymwys i Sefydliadau nad ydynt yn gymwys a ymunodd â'r Cynllun â chaniatâd y Bwrdd.

14. Dehongliad

Oni fo'r cyd-destun yn mynnu fel arall bydd y diffiniadau a'r dehongliadau a nodir isod yn gymwys i'r Rheolau hyn:

Ystyr "**achwynydd**" yw myfyriwr neu gyn-fyfyriwr sydd â hawl i ddod â chwyn o dan y Cynllun.

Ystyr "**Adolygydd**" yw'r Dyfarnwr Annibynnol neu'r Dirprwy Ddyfarnwr neu unrhyw berson arall y dirprwywyd iddo adolygiad cwyn.

Ystyr "**Adroddiad Blynyddol**" yw pob adroddiad blynyddol ar gyflawniad a swyddogaethau'r Dyfarnwr Annibynnol yn unol â pharagraff 11.5.

Ystyr "**Argymhelliad**" yw argymhelliad sy'n cyd-fynd â Phenderfyniad Ffurfiol.

Ystyr "**Bwrdd**" yw bwrdd cyfarwyddwyr y Cwmni.

Ystyr "**Cyllideb Flynyddol**" yw pob cyllideb ariannol flynyddol i'r Cwmni am y cyfnod cyfrifo perthnasol.

Ystyr "**Cynllun Busnes**" yw pob cynllun busnes blynyddol ar gyfer y Cwmni am y cyfnod cyfrifo perthnasol.

Ystyr "**cwyn**" yw cwyn yn unol â pharagraffau 2 a 3 gan gynnwys rhan o gwyn.

Ystyr "**Deddf**" yw Deddf Addysg Uwch 2004.

Ystyr "**Deddf Cwmnïau**" yw Deddf Cwmnïau 1985 a 2006.

Ystyr "**Ffurflen Gais y Cynllun**" yw ffurflen gais mewn diwyg a gymeradwywyd gan yr OIA ar gyfer gwneud cwyn o dan y Cynllun.

Ystyr "**gweithdrefnau cwyno mewnol**" yw'r gweithdrefnau cwyno ac apêl hynny o eiddo SAU sy'n ymwneud â myfyrwyr ac sydd, er mwyn osgoi amheuaeth, yn cynnwys, ond heb gyfyngiad, weithdrefnau yn ymwneud â chwynion myfyrwyr, apeladau academaidd, materion disgyblu a thoriadau ar godau ymddygiad a rheoliadau.

Nid yw "**Ilys neu driwlnlys**" yn cynnwys y llysoedd neu'r tribiwnlysoedd hynny sy'n rhan fewnol o SAU neu a sefydlwyd yn unol â phwerau SAU.

Ystyr "**myfyriwr**" yw myfyriwr sydd neu a oedd wedi ei gofrestru/ei chofrestru yn y SAU y cwynir amdano (neu o dan yr amgylchiadau a ddisgrifir ym mharagraff 2.2 sydd neu a oedd wedi ei gofrestru/ei chofrestru yn y sefydliad arall hwnnw)

Mae gair lluosog yn cynnwys yr unigol ac fel arall.

Bydd cyfeiriad at statud yn y Rheolau hyn yn cynnwys cyfeiriad at y statud honno fel y gellir ei haddasu, ei newid, ei haildeddfu neu ei hatodi o bryd i'w gilydd.

Ystyr "**Penderfyniad Ffurfiol**" yw penderfyniad terfynol a gyflwynir gan Adolygydd yn dilyn adolygiad o dan y Rheolau hyn.

Ystyr "**Sefydliad Addysg Uwch**" neu "**SAU**" yw unrhyw un o'r sefydliadau canlynol yng Nghymru neu yn Lloegr:

(a) prifysgol (pa un a yw'n derbyn cymorth ariannol o dan adran 65 yn Neddf Addysg Bellach ac Uwch 1992 ("Deddf 1992") ai peidio) y traddodir ac y cadarnheir ei hawl i grant drwy Ddeddf Seneddol, Siarter Brenhinol neu orchymyn o dan adran 76 yn Neddf 1992;

(b) coleg, ysgol neu neuadd gyfansoddol/cyfansoddol neu sefydliad prifysgol arall a ddaw o fewn (a) uchod;

(c) sefydliad sy'n cael ei redeg gan gorfforaeth addysg uwch, fel y'i diffinnir gan adran 90(1) yn Neddf 1992;

(d) sefydliad dynodedig, fel y'i diffinnir gan adran 72(3) yn Neddf 1992,

neu Sefydliad nad yw'n Gymwys sydd wedi ymuno â'r Cynllun â chaniatâd y Bwrdd

Ystyr "**Sefydliad nad yw'n gymwys**" yw sefydliad addysg uwch nad yw'n sefydliad cymwys yn unol â Rhan 2 o'r Ddeddf.

15. Newidiadau i'r Rheolau

Gellir newid y Rheolau hyn o bryd i'w gilydd yn unol â pharagraff 10.13.

16. Y Gyfraith

Llywodraethir y Rheolau hyn a'u dehongli yn unol â chyfraith Cymru a Lloegr.